

靜

志

居

詩

話

靜志居詩話卷四

秀水朱竹垞先生著

扶荔山房編輯

陶宗儀字九成黃巖人少舉進士不中卽棄去儻
居松江至正間累辭辟舉張氏開闢軍諮亦
不就洪武六年舉人才至京以病固辭得放歸

有滄浪權歌南村集

南村練習掌故元朝野舊事藉輟耕錄以存其餘若草
莽私乘游志續編書史會要皆有裨史學人明自稱其
居爲小栗里雖好爵未縻然其集中詩如乙卯人日云

天子居大室念民日孜孜上帝昭聖心報錫以雍熙紀
行詩云弭櫂中和橋儻舍千步廊報名謁鴻臚會朝筵
鷓行國安四方靜君明六卿良聖德湛汪濊慶祚衍靈
長入都門詩云虎踞龍蟠真聖主天開地設古神州早
朝詩云黼坐正中天咫尺叩頭丹陛益凌兢聞皇太孫
卽位詩云先帝逍遙游碧落神孫端拱坐明堂九重統
握乾坤大萬國恩霑雨露香動植飛潛滋德色都兪吁
嘒慶明良老臣舞柝南村底笑對兒孫兩鬢蒼竊謂此
等詩可以不作可以不作而作之宜錄入明詩矣

附錄愚山云九成詩自敘洪武二十九年丙子率諸生赴禮部考試讀大誥賜鈔遣歸豈其晚年亦曾列官教授邪 高二鮑云九成畫天台山圖自題云予挈家避地雲間杜樹之北背負九峰皆平衍無奇每憶故山爲作此圖所謂杜樹之北在松江府治東北十餘里卽今泗涇南村草堂之址在焉又名小栗里倪元鎮王叔明俱爲之寫圖予皆見之

舒頔字道原績溪人元末台州學正明初禮聘以疾辭不出學者稱爲貞素先生有華陽貞素齋

集

道原以貞素名齋雖絕意仕進然觀其集如祀事詩三賢堂登源廟碑既孫其言未免降其志矣其自傳云先生喜歌詠或古風長律取意而足不蹈襲不求奇務在理勝又自敘云當飢寒鬱悒不堪於懷發而爲哀怨憤切之語關乎風教繫乎世事槩見乎辭可謂得失寸心知矣爲苗民所苦一歌直寫胸臆絕少支辭第用韻太雜故置不錄

附錄愚山云道原辭名之後名其齋曰貞素嘗有詩

曰湖海半生客乾坤一布衣義哉周伯叔飽食首陽
薇其寄託如此

謝應芳字子蘭武進人自號龜巢老人有龜巢集
龜巢集未鏤板子得其手鈔本一十八冊大半酬應之
作所居龜巢一在滬上一在橫山先後有記其略云千
歲之龜巢於蓮葉以葉爲巢初不費經營之力也暇與
田夫野老涉桑苧之園過桃李之蹊瓦盆濁醪歌舞酬
醉若曳尾泥塗者然雖巢外之樂其樂亦因巢而得也
又云予所至以龜巢名室蓋不以棟宇爲巢而以天地

爲巢也峻宇雕牆莫知其光華門圭竇莫知其陋誦其
文可謂達觀之士矣其上饒參政啟云辭親日下奉檄
浙東紛紛服州縣之勞區區益升斗之祿望蓬萊於滄
海棲枳棘於慈溪謝張雲門啟云鮎上竹竿往歲之功
名可笑龜巢蓮葉近年之身世如浮則嘗仕於元者也
沈貞字元吉長興人元末隱居橫玉山之士林自
號茶山老人明初不仕有茶山集

茶山老人敦蠱上履二之節從白雲游始終不出方之
楊廉夫輩呼來卽來遣去便去者如論奕然更高一品

矣集五十卷惜不傳從陳編中搜得樂神曲一十三首
不無冗長且多闕文因汰其六稍爲刪易補綴頗覺奇
古

華幼武字彥清無錫人有黃楊集

彥清以賞雄於鄉陳子貞謂其愛詩甚篤而奪於多事
題其集曰黃楊且云黃楊遇閩則厄彥清能不爲閩所
厄則干霄聳壑子將承其餘陰之下矣其後宅燬於火
始移吳郡繼遷海虞又居吳江瑣尾播遷吟詠不廢當
明之初富家類多徙濠彥清獨以上中山王詩得免於

詩言言 卷四
四
禍幸矣詩頗淺易曲林睡起二絕特工選家多不錄特表出之

附錄俞有立云棲碧翁處患難流離未嘗廢吟詠老而愈工要其胸中不以窮通得喪易其志槩可見矣其詩一以工部爲法句不苟造章不漫成務去其拗鄙而求其雅麗長篇春容短吟潔淨有人所不及者貢悅初名性之字友初世家宣城之南湖人號南湖先生仕元爲閩省理官明初隱居越之山陰卒門人私諡曰貞晦有南湖集

貞晦詩滑而不澀縱而不控固是雲林玩齋家法若越
王臺作風作鳴潮吹雨散山如走馬渡江來則警策也

張昱字光弼廬陵人遷杭元末行樞密院判官有

張光弼集

光弼策張士誠之必敗作詩刺之云一陣東風一陣寒
芭蕉長過石闌干只消幾箇膏騰醉看得春光到牡丹
士誠招之不赴投以詩云山中碁局迷樵客溪上桃花
誤釣船又云殘夢已隨舟楫遠五湖春水一鷗飛其居
在西湖壽安坊今之花市也貧無以葺廬凌彥獅草募

疏云昌黎寄玉川子首稱洛城破屋數間東坡題緣筠
軒終比揚州纏腰十萬必能修我牆屋方可有此室廬
一笑居士在江西生爲斗南望詩名優於張籍生計劣
於陶潛囊無一錢之畱家徒四壁之立若非慷慨多助
安得輪奐一新必欲取杜工部草堂貲何時可辦儻葺
得楊太尉槐市塾今歲無憂諸賢圖之名教事也後孝
陵徵至京深見溫接憫其老曰可閒矣遣還因自號可
閒老人嘗於酒邊爲瞿宗吉誦已作歌風臺詩云世間
快意寧有此亭長還鄉作天子以界尺擊案淵淵作金

石聲其詩派出西崑未免過於濃縟如萬斛春光金盞
酒百年心事玉人箏燒殘蠟燭渾成淚折斷蓮莖却是
絲暮雨欲來銀燭上春寒猶在酒尊空星河織女從離
別海水蓬萊見淺清蛺蝶畫羅官樣燭珊瑚小柱教坊
箏自從玉樹成歌後曾見銅仙下淚來牡丹開後春無
力燕子歸來事可憐分司御史心先醉多病相如渴又
生月色夜畱江叟笛花枝春覆市樓箏揚州城郭高低
樹瓜步帆檣上下風令楊大年見之定把臂恨晚也
又云陳雲嶠云白翎雀生於烏桓朔漠之地雌雄和鳴

自得其樂世皇因命伶人碩德閭製曲以名之曲成上
曰何其未有哀怨衰嫠之音乎時譜已傳矣故至今莫
之改陶九成云白翎雀者教坊大曲也始甚雍容和緩
終則急躁繁促殊無有餘不盡之意楊廉夫云白翎雀
能制猛獸尤善擒鴛鴦廉夫有二詩詠之張思廉王子
充張光弼皆有作第雲嶠言製曲者碩德閭而光弼獨
云西河伶人火倪赤能以絲聲代禽臆微有不同

吳志淳字主一以字行無爲州人仕元爲翰林待
制濠泗兵起徙家豫章復徙鄞有環碧軒柳南

漁隱二集

待制草隸著名詩亦雅正虞道園贈詩云揮毫妙得中
郎法倚席長吟老杜詩爲名流傾倒若此晚賦遣懷詩
云爲儒已入他州籍垂老頻收故國書誦之凄然增淪
落之感

顧觀字利賓丹陽人仕元爲星子縣尉遇亂流寓
紹興

吳主一顧利賓入明未聞通籍然其詩編入劉仔肩明
雅頌正音

附錄王元美云觀送人詩重經白下橋頭路頗憶元
都觀裏花吳江詩鴻鴈一聲天接水蒹葭八月露爲
霜此等語參之貞元長慶亦無媿色

高明字則誠瑞安人元至正進士爲處州錄事太
祖聞其名召之以老疾辭還有柔克齋集

顧仲瑛輯元耆舊詩爲玉山雅集中錄高則誠作稱其
長才碩學爲時名流可知則誠不專以詞曲擅美也世
傳琵琶記爲薄倖王四而作此殆不然陸務觀詩云斜
陽古柳趙家莊負鼓盲翁正作塲死後是非誰管得滿

村聽說蔡中郎是南渡日已演作小說矣聞則誠填詞
夜案燒雙燭填至喫糠一齣句云糠和米本一處飛雙
燭花交爲一洵異事也蔣仲舒堯山堂外紀謂撰琵琶
記者乃高拭其字則成別是一人按涵虛子曲譜有高
拭而無高明蔣氏或有所據俟再考

徐暉字仲由淳安人洪武初徵秀才至藩省辭歸

有巢松集

識曲者目荆劉拜殺爲元四大家殺狗記則仲由所撰
也其言曰吾詩文未足品藻惟傳奇詞曲不多讓古人

蓋自知之審矣葉兒樂府滿庭芳云烏紗裹頭清霜籠
落紅葉林邱淵明彭澤辭官後不事王侯愛的是青山
舊友喜的是綠酒新菊相拖逗金尊在手爛醉菊花秋
比於張小山馬東籬亦未多遜詩雖非所長然亦不俗
涂幾字守約又字孟規宜黃人有涂子類藁

涂君於文高自矜許集有弔余文賦云負予才之宏異
兮早卓倜而莫羣較錙銖于古人兮又何數乎今之人
而又云芰荷不可以爲衣兮女蘿不可以爲帶則匪安
於遊世者也嘗撰時事策十九篇上書孝陵自稱臣平

生苦學見於文章時輩妄推謂當與漢唐諸文人略相先後使居館閣紀述聖君賢臣之事業足以載當世而垂無窮亦大言不怍矣然其文頗牽率鄉人鄒矩元方序之謂沈雄悲壯佚宕奔逸此欺罔之言也詩亦平平乏警策俗傳酒詩一卷或云是幾所作

沈夢麟字原昭歸安人元末武康尹入明以賢良徵不仕有花谿集

原昭元季隱於花谿劉伯溫曾相依谿上贈以詩云杜陵老去詩千首陶令歸來酒一樽及入明雖不受爵而

校文閩浙者三同考會試者再故孝陵以老試官目之
其分校閩闈在洪武丙子歲當時同考官有劉子彥蔣
文質劉季治蘇鳳儀均有詩酬和今不能悉舉其名矣
花谿在歸安縣治東南七十里土人名曰花城原昭田
產頗饒其子孫坐事謫戍田亦沒官歸於誠意伯劉廌
廌集中有花谿田舍詩云田間處處三楹屋門外家家
半曲湖婦踏水車欵抱子兒撐漁艇笑驚鳧想見風景
之足以移情矣原昭詩格清穩特少警拔句

滕克恭字安卿祥符人仕元爲集賢院直學士遇

亂避地錢塘洪武初兩聘充本省考試官有謙齋橐

崑山周壽誼一百一十四歲魏觀守蘇州舉爲鄉飲賓
新昌呂不用有叔祖百歲作百歲老人歌其辭曰吾家
老人一百歲益益晴檐曝駘背自言生見宋餘黎元氏
興亡身尚在大明洪武聖人作坐沐雨露又七載蓋兩
人皆生於宋歷元及明尚存信人瑞矣然兩人初無文
采表見斯猶草木之年爾若吾鄉鮑仲孚八十餘被徵
以白衣充會試考官歸田久而後沒吳興沈原昭錢塘

寓公滕安卿皆以元廢官屢典文衡原昭年九十安卿
至百有餘歲斯則儒林之盛事也

葉暕字景南金華人有樵雲獨唱

永康應廷育撰金華先民傳乃不及葉暕蒙叟謂暕登
洪武進士考之登科錄惟建文庚辰榜有葉暕金華縣
人樵雲旣生于大德庚子洪武初元年已六十有九至
建文二年則百有餘歲始釋褐矣無是理也今改從顧
氏

附錄顧俠君云景南自序所作詩以爲薪桂老而雲

山高寒音調古而巖谷絕響故名其集曰樵雲獨唱
長孫雍編次成帙曾孫戶部尙書淇重刻之廣東布
政使安邱袁凱爲之序錢氏列朝詩集稱顛字伯愷
洪武中登進士官行人司副免歸按集中挽荆山上
人云大德庚子春生我及此公以年計之當洪武戊
申景南年六十有九矣詩多高曠之言絕無及仕宦
者凱序云使先生後生數年際我朝之明盛與一時
俊乂竝列庶職其事業必有可觀惜其不然而徒於
言語文字間見之其志不亦可哀乎袁序作於成化

清言言 卷四 十一
間不應有誤錢氏所云未知何所據也又震澤編所
載東山葉爾字伯昂嘗以鄉貢爲和靖書院山長此
則又一同名姓者爾

張庸字惟中慈谿人元季兵亂竊據者署爲上虞
山長不就明初聘不仕有全歸集

惟中高遯世之節然與龍提學子高桂正字彥良烏永
新繼善諸君子先後往還酬和其送胡維舟金陵歌云
金陵帝都天下壯萬國會同天浩蕩昔年聘我我曾游
會上鳳皇臺上頭則明初亦嘗受聘幣而未通籍者殆

昔人所云隱不違親貞不絕俗者邪

藍仁字靜之崇安人明初內附隨例徙濠尋放還

有藍山集

二藍學文於武夷杜清碧學詩於四明任松卿其體格
專法唐人間入中晚蓋十子之先閩中詩派實其昆友
倡之藍澗仕而藍山隱其戲題絕句云朝野文章自不
同壤歌何敢敵黃鐘山林別有釣天奏長在松風澗水
中然其述懷詩云無才甘下位有識笑庸人又云何事
漁磯棄空煩鵲印隨又有甲寅仲冬攝官詩題則靜之

亦不終於山林者也集有蔣易張渠二序易字師文自
號橘山真逸嘗選皇元風雅予有其書渠字孟方自號
雲松樵者靜之贈詩云文宗曾子固篆逼李陽冰惜其
著作罕傳矣

又云網巾之制相傳明孝陵徵行見之於神樂觀遂取
其式頒行天下冠禮加此以爲成人三百年未之改然
題詠者寡獨藍靜之有三詩予錄其一焉其詞云白頭
難掩雪霜蹤纖手穿成絡索同映帶暮年微纓鑲遮藏
秋色久攀鬢牽絲祇訝蛛臨戶覽鏡翻愁鶴在籠便與

黃花相見好不愁破帽落西風其二詩謝劉蘭室見惠
而作一云故人於我最相親分惠青絲作網巾鏡裏形
容加束縛眼中網目細條陳少遮白髮安垂老轉襯烏
紗障俗塵更與籜冠藜杖稱世間還有葛天民一云故
人念我鬢毛疎結網裁巾寄敝廬白雪盈簪收已盡烏
紗著紙畫難如門臨寒水頻看鏡籬掩秋蓬不用梳昨
日客來應怪問衰容欲變少年餘

王沂字子與秦和人洪武初徵爲諸王說書授福
建鹽運司副使以老辭歸學者稱爲竹亭先生

後以孫直貴贈光祿大夫少傅兼太子太師吏部尚書與弟佑俱以詩名有竹亭遺藁

子與詩格清婉如水墨雲山絕勝調鉛殺粉

附錄梁用之云先生昆弟肆力於詩與大梁辛好禮楊伯謙上元周伯寧清江彭聲之豫章萬德躬倡詩學於東南觸景遇事凡可喜可愕可怒罵可太息者一寓於詩音調格律之嚴必合於典則所傳二妙集者門人蕭翬所收輯直十百中一二耳

易恒字久成廬陵人徙家崑山洪武中應薦至京

以老罷歸有陶情集

陶情一集邊幅太拘其示諸生詩云情婉味終涵雋永
調高語不在矜持其所尚然也

附錄莫士安云久成年逾八十有四而能吟詠太平
娛樂晚節短句蘄絕長什冲融近體齊整不難步追
先古

遙昶字光古修武人有遠光古集

光古詩學晚唐句如潭淨開天鏡山昏著霧巾樹枝猿
挂折花片鳥銜來僧舍竹松院人家瓜菜園雲來羣壑

暗日下半川明秋色老棲樹夕陽明在山令賈島佛見
之當亦點頭也

韓奕字公望吳人有蒙齋集

明初吳中高士三人一爲長洲王賓仲光一爲崑山王
履安道其一則公望也三人皆隱于醫仲光詩多俚率
安道遊華山作詩一百五十首然無足錄者必以公望
爲巨擘焉

附錄愚山云公望生於元文宗時少目眇筮得蒙卦
遂扁其室曰蒙齋絕意仕進與王賓偕隱於醫姚善

守吳造請之公望於布簾內答云不在一日掩入其
室公望走楞伽山善隨至則泛小舟入太湖善歎息
曰韓先生所謂名可得聞身不可得而見也當日吳
中高士以公望與賓爲稱首

王賓字仲光長洲人有姑蘇雜詠

附錄愚山云仲光與姚榮國交榮國定策後徒步往
訪歡若平生作賑災記鋪陳其功德沒而榮國爲立
傳兩公契分如此世傳仲光詆謨榮國方盥却走終
身不見吳兒委巷妄語流談史家不可不正

鐳炳字彥昂以字行鄱陽人明初獻書任中書典
籤出爲大都督府掌記有春雨軒集

彥昂詩純效鐵厓宜鐵厓之傾倒也至其病過於繁豔
特擇其淡雅者著於編

附錄愚山云彥昂洪武己未弔余廷心墓文自稱大
都督府掌記集載哀曹國公詩云三年忝記府龍鍾
侍文墨又沐西平輓詩云十年參幕府慙媿簪纓客
曹國公以洪武三年領大都督府事西平以四年同
知大都督府益彥昂初任中書典籤而後從事於都

府也詩集危素宋濂序之以爲兼謝康樂岑嘉州韋應物之長而駸駸進於漢魏楊維禎則愛其詩兼諸體特爲評點其推重之如此

郭奎字子章以字行巢縣人明初朱文正開大都督府節鎮洪都太祖命奎輔佐參謀及文正得罪坐不諫誅有望雲集

參謀詩格清剛句無浮響頗近汪忠勤

夏煜字允中金陵人太祖下金陵辟爲行省博士

調浙東分省

附錄愚山云劉辰國初事蹟云夏煜犯法取到湖廣
投于江俞本記事錄云至正二十三年十二月夏允
中家人販鹽敵境提至軍前置黃鶴樓下大浪中三
日而死予考陶主敬集有洪武元年送夏允中總制
浙東兼巡撫之詩允中讀宋太史潛溪集詩云景濂
其字大夫爵宋以洪武二年六月總修元史始得階
亞中大夫則洪武元二允中尙在安得云癸卯歲沉
於楚江邪

李應榮字顯道東陽人元末平江路教授同章溢

謁太祖於軍門畱參戎務以說降方國珍累官
尚寶少卿

實錄說降方國珍爲主簿蔡元剛處士陳顯再使爲夏
煜陳顯而尚寶奉使途中作五古見東陽歷朝詩

劉駟字宗道龍谿人洪武初倉攢以秀才徵試第
一拜左都御史後坐事徙滇有愛禮先生集

宗道講學遠師北溪其闢釋老甚嚴目佛爲泥旻集中
有同安歎云噫嘻吁紫陽之化衰家家阿彌儒也墨衣
墨也墨衣滿城游遨誰我知不如歸也不如歸又游天

蓋寺詩云若無僧寺塔直是一唐虞斯亦能言距楊墨者已

丁麟字彥祥海鹽人洪武乙丑進士除給事中改御史坐法死

武原雙丁兄麒弟麟嘉禾二王兄鏞弟鈞詩雖格調卑卑然先民有作鄉曲後學不可不爲表章也麒字彥禎官至濟南知府詩如烟寺行吟云得句便題林外竹脫巾長挂塔前松送人云西山日薄烏啼急南國風高鴈影希天星湖云隄畔馬嘶芳草碧沙頭人上畫船輕聞

琴村云別鶴不聞雲外語野鳥時向屋頭鳴亦能拔俗
許伯旅字廷慎黃巖人洪武中官刑科給事中有

介石稟

天台林公輔嘗述廷慎論作詩之法矣其辭曰法可言
也法之意不可言也上士用法得法之意中士用法得
法之似吾詩幾用法矣如是而起如是而終如是而爲
開闔如是而爲抑揚頓挫如是而爲輕重高下意之所
至辭必與俱罔未嘗囿乎法亦未嘗廢乎法也古之藝
人若庖丁輩隨其心手所出無他焉亦用其法爾由是

而觀天下之術未有不用法而能神者也又論宋元二代之詩云人皆謂宋之文高於元元之詩高於宋殊不知宋之詩亦高於元也論詞語工麗音節瀏亮宋或不及於元至於說古今道事理輕重明白豈元諸公所能及宋哉其言具有深旨宜當時有小杜之目惜其集不傳惟餘赤城續志所載寥寥數篇而已

吳去疾字去疾安慶人給事中

去疾列朝詩集不載其官闕考實錄吳元年十月帝御戟門與給事吳去疾等論政務又嘗爲議律官

張適字子宜長洲人洪武初以秀才舉擢工部都水郎中以病免後復舉明經授廣西理問歷滇池魚課宣課二司大使卒于官有甘白先生集子宜免都水郎歸卽朱長文樂圃故地居之詩所云坊存前哲號屋貯古人書也一時名流都爲題詠見鐵網珊瑚詩有樂圃江館南湖江行滇池等集燬於火其孫祝得十之二三於煨燼之餘及士林傳誦之作合爲甘白先生集今雕本已罕傳予從其後人星借觀錄之

楊彝字宗彝餘姚人洪武中以人才舉爲沔陽倉

副使遷都察院司獄調長泰主簿以獻詩擢吏部考功主事謫居滇南有鳳臺貴竹東屯南游諸橐

楊君傳詩不多頗饒跌宕之趣

戈鎬字仲京鎮江人洪武初徵士官禮部主事有鳳臺集

仲京詩原出於溫岐

冷謙字啓敬嘉興人洪武初太常司協律郎

世傳協律仙去嘉興府治東北碧漪坊建祠祀之里人

禱夢多驗祠三面距水今爲土填淤矣協律著作罕傳
僅從郁氏書畫跋錄得一首

朱芾字孟辨以字行松江華亭人洪武初徵授翰
林編修改中書舍人

明初詩人善書法者正書則楊孟載張翔南行楷則唐
處敬張藻仲草書則宋仲溫周履道章草則盧公武隸
則吳圭一邵復孺大小篆則張士行宋仲珩而孟辨名
尤在諸子之上嘗以所書瘞之細林山中題曰篆篆董
徵士良用贈詩云華亭朱茂才好古喜欲顛一掃世俗

書習篆忘食眠秦望并之翠碧落兼緜泉小者案間列
大者屋壁懸平生囊橐貲多充買碑錢功深學既精齒
壯志逾堅池魚染皆黑鐵硯磨將穿摹搨累萬番期差
古人肩師法正在茲什襲比蹄筌孫樵文自祭智永筆
忍捐嵯峩細林山函之瘞其巔聚土封若堂籙石表爲
阡寶劔賈胡發玉柳蔓草纏何如篆篆光夜映列星躔
錢提舉思復歌云雲間苦嗜古手校科蟲辨魚魯明窗
淨几風日佳臨摹一掃千番楮商彝周鼓真吾師蠟扁
沉著沙畫錐鸞迴鳳翥龍天矯長戈短劔相交馳書草

日積充棟櫛保愛何啻璧與珪細林山中一坏土細笈
絨膝重閉之合學士灘哥石硯篇誦之可謂好事者也
宋璫字仲珩浦江人學士濂仲子洪武九年召爲
中書舍人
仲珩受業於趙古則故精於六書南村稱其大小篆純
熟姿媚行書亦有氣韻今誦其五言離奇妥帖惜不永
天年兼爲書法所掩

附錄愚山云仲珩工書法真行草篆俱入能品方希
直稱爲威鳳翀霄祥雲捧日評者謂太史公之文舍

人之書皆本朝第一而其詩尤駿發汗血一蹶未見其止惜哉

史靖可鄞縣人中書舍人

潛溪之歸也孝陵諭之云大江春來風浪多宜就裏河
達於家靖可送行詩云君王親爲計歸程幾日攜家出
鳳城江上春來有風浪扁舟好向裏河行蓋賦以紀實
也靖可以吏部奏差洪武九年十一月授中書舍人載
實錄滎陽外史集有史行可文可殆其昆弟行

陳潛夫字振祖錢塘人官國子監學正

吳人朱景春名所居之軒曰安分滕遠爲寫作圖題其
卷者甚衆潛夫及田子貞詩差優潛夫於洪武十八年
二月曾上書言事載實錄

莫士安名級以字行更字維恭歸安人洪武初爲
府學教授遷知黃岡縣事入爲國子助教

士安集不傳僅見於湖海耆英詩集其湖山圖長歌則
從吾鄉郁氏書畫題跋中錄之永樂初以助教治水江
南遂僑居無錫自稱柏林居士又號是菴載縣志流寓
門今人罕有知者附識之

李曩字宗表錢塘人洪武初國子助教有艸閣集

艸閣得詩法於李季和然季和猶爲廉夫薰染艸閣歌
行則一氣孤行獨開生面正如淮陰之師多益善囊
沙拔幟辟易萬人當時四傑十友二肅二元各有標榜
如此逸氣高格顧詩家月旦不及焉信夫知音者之難
也

管訥字時敏松江華亭人洪武中徵拜楚府紀善

陞左長史乞致仕王請命于朝畱居本國祿之

終身有秋香百詠蚓竅還鄉紀行等集

昔人名集往往自謙若殷文圭曰鏤冰張舜民曰畫墁
晁補之曰雞肋林敏修曰無思葛立方曰歸愚薛季宣
曰浪語樓鑰曰玫瑰王與鈞曰藍縷王翰曰敝帚洪希
文曰軒渠未易悉數明初猶然劉基朱同皆曰覆瓿高
啓曰缶鳴董紀曰西郊笑端華幼武曰黃楊周是修曰
芻蕘黃淮曰省愆雷貫李馨皆曰知非羅泰曰覺非王
文靜曰蠅聲管訥曰蚓竅是也管師事廉夫集經鶴年
論定春容疏越豈出景文之下而說詩家人選寥寥卧
子舒章生長五茸知有袁而不知有管竟置不錄徑寸

之珠詎可遺哉

附錄丁鶴年云時敏詩氣象雄渾襟懷曠達用事親切措辭醇雅黃文獻公謂文章莫難乎詩詩莫難於近體時敏體製嚴整間出新語亦復清俊非文獻所云難者與又云五七言律至晚唐氣漸衰靡不可爲法惟絕句詩至晚唐尤爲精緻宋人不得其門而入元人惟龍麟洲范清江虞青城得其三昧餘或偶得之而不純時敏絕句俱有法度豈非常私淑於三公故邪又云時敏詠物詩形容精密非筆頭有五色花

者不能

貝翔字季翔崇德人助教瓊之子洪武中官楚府
紀善有平澹集

紀善集以平澹名故管長史寄詩云花竹臨窗筆硯清
初秋一雨便涼生錦囊平澹詩千首近日新編幾卷成
詩如夕陽山好樓中見春水船齊樹杪行信乎平澹矣
所云山者蓋指爰史二山

張璧字景辰陳畱人徙華亭洪武初鄉舉除潞城
知縣終蜀府典寶

陳畱張樞夢辰徙家華亭城東門築室曰讀書莊陶南
村贈詩云幅巾短杖林和靖斗酒長篇李謫仙又云寫
書竹簡拈鮮碧臨帖藤箋捐硬黃或勸之仕不應日與
弟子講春秋人目之曰林泉民貝廷琚爲作傳其弟景
辰亦能詩有過嘉禾詩云梭頭艇子輕於葉雪色沙鷗
白似鷺可入畫也

浦源字長源無錫人洪武中晉王府引禮舍人有
浦舍人集

長源居九龍山中築聽松軒凌彥翀爲作記其後與經

淮河溺死故王達善祭以文云長源之文豔若天葩云
何不幸竟墮泥沙詩雖與子羽同調然才不逮林當與
二元伯仲句如聽雞曉闕疎星白走馬春郊細柳黃細
雨疎燈聞落葉斷雲高樹見明河雨中黃葉孤村路湖
上青山遠寺鐘三月春陰垂細雨幾家寒食起新烟春
潮渡口停官舫夜雨山頭見驛燈衣上暮雲吳苑雨馬
頭秋色晉陵山潮生漁浦看下雨過鄰家竹許鉏官
路暝烟迷驛舍郡城寒火出更樓青山馬尾彎弓見畫
角城頭帶月吹暮雨燈明湖上塔秋風砧響郭西家杏

花寒食春江店榕葉薰風瘴海船今夜風傳何處笛他
鄉月照故園衣寒廳掩雪晨衙散暮郭連山夜燒明均
有風韻匪僅雲邊樹裏一聯而已亦善畫山水竹石學
倪雲林程原道詩所云雲林弟子浦長源也

附錄愚山云長源聞林子羽老於詩學欲往訪之無
由以收買書籍至閩子羽方與其鄉人鄭宣黃元輩
結社長源謁之衆請所作至雲邊路繞巴山色樹裏
河流漢水聲驚歎曰吾家詩也遂邀入社

桂衡字孟平仁和人洪武中錢塘儒學訓導遷山

東建文庚辰授谷府奉祀

復州裂本蘭亭卷首有錢舜舉畫蕭翼賺書圖陶南村
謂鴈行定武宋理宗賜賈平章一百十七本此其一也
桂孟平題詩云使星東犯斗牛來猿鳥忘機豈見猜莫
笑老僧藏不得昭陵玉匣有誰開圖舊藏吾鄉郁氏

張紳字仲紳一字士行濟南人仕明爲浙江布政
使

方伯工大小篆精於賞鑒法書名畫多所品題撰法書
通釋一卷自稱雲門山樵亦稱雲門遺老齊東自周公

謹而後復有此人其詩不藉雕琢琅然可誦如湖中玩月詩地與樓臺相上下天隨星斗共沈浮亦佳句也

董紀字良史以字行更字述夫上海人洪武初官

江西按察僉事有西郊笑端集

述夫元之耆舊其詩賴善卿編之大雅集中題海屋云過橋雲磬天台寺泊岸風帆日本船亦不爲率漫也

謝肅字原功上虞人舉明經歷官福建按察僉事

有密菴集

原功諱貢禮部玩齋於吳山仰高亭進曰先生之門亦

有瑰偉倜儻拔出之士乎時貢奉詔漕閩廣粟當泛舟
大海貢語曰子能從吾游乎對曰丈夫觸蛟龍犯風濤
如行衽席上爾遂同載至海昌屬海上多警因畱居州
北執經問難凡一詩之出一文之就折衷論議必當於
理乃已旣而貢沒於寓舍原功經紀其喪刊其遺集及
出按漳泉坐事被逮孝陵御文華殿親鞫肅大呼曰文
華非拷掠之地陛下非問刑之官請下法司乃下獄獄
吏以布囊壓死夙與唐處敬齊名號會稽二肅其詩雖
不及處敬亦磊落不凡

藍智字明之崇安人明初應薦授廣西按察僉事
有藍澗集

二藍出處不同藍山藍澗二集選家誤有參錯今依明
初雕本刊正

王佑字子啓沂弟洪武三年舉教官擢監察御史
出爲廣西按察僉事改知崇慶州有長江萬里
稟

王氏二妙子啓詩遠遜子與其擢御史也事在洪武三
年五月二十一日中書吏部奉旨選天下教官入覲奉

天門適太史奏文星見帝親擢十八人俱爲監察御史
次日詣武樓下賜袍帶二十五日之任臺官傳命賜燕
集中有紀恩詩七首其束胡僉事子祺詩云聖主親除
十八人與君同郡最情親寄秦郎中文剛詩云奉天門
下共恩榮十八人中第二名寄趙合州夔馬綿州真詩
云人生良會不可常聖恩同擢那能忘是文剛也夔也
真也皆在十八人之列矣而實錄載與選者十九人吉
水胡子祺桐廬魏潛王納河西李顏永豐丁節永嘉許
宏士萬安夏贊樂清李時可衛輝陳士舉龍泉劉叔蕭

肥夏起瑞安馬漢分宜劉沂平陽孔希普永新歐陽子韶泰和王子啓安福歐陽楚廬陵胡伯清而無文剛等三人姓名恐國史所書未若子啓詩集之得其實也又海棗陳氏書王僉事事蹟第云以僉事除崇慶知州已而得投閒歸鄉而集中有獄中述懷三首其一云有枉不能直呼天天不聞厥初正田賦思以上報君豈其被蛇虺糾結情紛紜嫌疑既先入真僞無由分其二云沃壤袤千里曾無水旱憂亂來地無主官賦籍未收下車日經理比屋皆子仇太倉得稊米憲綱增罪尤吾

豈厚斂者仰天思悠悠其三云蜀州古險塞其俗凶且
強有司坐罷悞譬以羊將狼紀綱稍自振螫毒不可當
我徒剛易折衆以凶爲良誦其詩可得獲罪之由矣蓋
子啓政尙嚴厲其在廣西時尋適爲按察使胡子祺曰
古刑新國用輕典子啓曰蠻方素昧君臣父子之分黷
倫傷化不及此明禮法以示勸懲後將難制迨從其議
其牧重慶征科未免過嚴因而坐累迹近重斂此陳氏
諱而不言也

附錄梁用之云子啓先生以校官舉與永豐丁堅子

節同邑劉穀原實等一十八人俱同日俱拜御史所
爲詩沉渾雅淡質而不俚華而不媚

金綱字子尙嘉興人元季舉鄉試洪武初知蘇州
府以上書請減賦額賜死

子尙在元季雅負詩名家有詠軒周致堯爲賦詩其守
蘇州也以百姓苦官民田賦不齊里胥因緣爲姦乃上
疏請減賦額觸高皇帝怒賜死王文恪姑蘇志柳太守
嘉興志具書其事考洪武中蘇守三十人左謫者吳懋
坐事去者何異張亨被逮者王暄丁士梅湯德石海王

繹陳彥昌張冠黃彥端坐臙黥面者王文而子尙與魏
杞山皆坐法死當日領郡者亦不易矣

馬琬字文璧江寧人洪武初仕爲撫州知府有灌

園集

文璧以畫名詩亦清脫

甘瑾字彥初臨川人明初嚴州府同知一云官翰

林待制

明初臨川詩派專學唐人者揭孟同甘彥初也尙有張
可立甘克敬惜其詩不多見

附錄顧元言云二守思頗清僻如一瓢風外樹雙屐
雨中山錦衾成獨且羅扇覺先秋亦是高唱

蕭翀字鵬舉泰和人蘇州府同知

鵬舉爲劉子高弟子編其師集以傳者也詩格卑卑不
如其師遠甚

陳汝言字惟允吳縣人明初官濟南經歷坐法死
有秋水軒橐

吳縣二陳居船場巷並有雋才俱善詩工畫山水又皆
多鬢故有大髯小髯之目張氏據吳日惟寅隱居不出

惟允爲參軍頗親信用事南濠都少卿譚纂載洪武初
王叔明爲泰安知州廳事後有樓三間正對泰山叔明
寫爲圖張絹素於壁每興至輒一舉筆凡三年而圖成
時惟允爲濟南經歷一日胥會值大雪叔明欲改雪景
惟允曰如傅色何沈思良久曰得之矣爲小弓夾粉筆
張滿彈之粉落絹上儼然飛舞之勢相顧以爲神奇叔
明就題其上曰岱宗密雪圖因以贈惟允云後惟允坐
法當死臨刑猶從容作畫畫畢乃就戮張司丞來儀紀
以詩云若人悟懸解委蛇順天刑忼慨赴東市一日爲

千齡李公悲上蔡陸子喟華亭識機若不豫達生良可
經朱絃亦易絕仄景不可停從容灑芳翰炳煥若丹青
好藝永傳世精魄長歸冥披圖懷平素涕淚緣襟零說
者以兵解之法推之謂之畫解密雪圖陳氏世寶之松
江張學使廷采往觀坐卧其下兩日徐武功尤愛之後
以三十千歸吾鄉姚雲東未幾火作此圖遂付煨燼悵
矣予嘗見惟允山水真蹟積墨清潤與叔明不相上下
宜當日兩人相契之深也

附錄嚴蓀友云惟允精於山水詩如秋水濃於酒山

雲白似衣詩中亦有畫也

王蒙字叔明吳興人自稱黃鶴山樵元末官理問

洪武初爲泰安知州

倪元鎮詩畫最自矜重不輕許人獨題叔明畫云筆精墨妙王右軍澄懷卧游宗少文叔明絕力能扛鼎五百年來無此君其誠服若此高青邱云叔明爲趙文敏外孫而其畫法自立門戶別具一種姿態與文敏無一筆相似其筆格不下文敏宜矣蓋文敏書畫詩皆尙工緻而叔明意在活脫所寫溪山林木或有柯無葉畫家謂

之不了樹惟詩亦然往往不費推敲而有自然之致乃知善得師者不在循行矩步也

附錄愚山云陶九成弔黃鶴山樵詩序云洪武乙丑九月十日卒於秋官獄考清教錄僧知聰招云十二年正月往胡丞相府見王叔明郭傳華克勤在彼喫茶看畫則知叔明坐罪亦以胡黨也

劉秩字伯序豐城人洪武中知崇明州有秋南集伯序詩亦整鍊如芙蓉隔浦聽秋雨楊柳長亭看晚潮沙浦寒霜肥紫蟹野園秋雨熟黃瓜棟花落處風飄樹

魚子生時水滿田林下一篷冬聽雪樓中半榻日看山
亦琅然可誦也

吳文泰字文度吳縣人洪武中涿州同知有愚菴

集

文度與同郡丁遜敏學專事苦吟嘗閉戶共爲詩人見
其終日突無煙往視之方瞠目相對忘其未食也評者
謂其詩僻蹇似孟郊今觀其集頗淺易不煩冥索乃爾
烏斯道字繼善慈谿人明初以薦起知石龍縣調
永新以疾去官有秋吟橐春草齋集

繼善與兄本良性善竝著才名鄉人目性善爲春風先生繼善爲春草先生宋學士濂稱其文云俊潔如明月珠洶湧如春江濤楊布政子器稱其詩云疎秀若雨後春山綺麗若雲中翠巘矜許至矣戴叔能贈詩云達士不羈世投身向寬閒又云不有同心人誰其慰枯槁知非營營名利者也句如四顧闕無人一鳥空中鳴江水豈吾限可以相往還朝陽煦游條晴風送飛翼寂焉千載事傷此百年身落日近崦嵫於何從遠道鶴鳴子不和徒然有哀音具饒清氣其言曰詩之作非得夫天地

之清氣者不能也信然哉

馮伯初字正始嘉興人洪武初官府同知

郡丞子妻馮孺人遠祖也馮氏族譜載其詩三十餘首
予少日僅錄其崔貞姑廟詩一首其詞云貞姑遺廟練
塘坳古瓦漂零補白茅影帳有烟香細細明妝剩粉玉
礎礎連村未輟雞豚社獨樹長懸鶴鶴巢右族博陵銷
歇盡尙餘彤史一題鈔今予外弟金滌無後譜不復可
得矣貞姑廟在練浦塘一螺清東南廟外有橋土人以
貞姑爲土穀祠春秋社祭府志失載陳處士靈茂詩雲

衣金粉蝕煙帳蕙蘭銷亦過廟下作也有好事者補張堯同百詠則廟其一乎

俞貞木初名楨以字行更字有立吳縣人洪武初

以薦知樂昌縣改都昌

一云南安府南康縣

有集

明府有雕本集二冊予嘗見之於里中王山人翊書齋山人頗稱其詩而今訪之藏書家遂不復得又有日錄亦無存當日若金侍郎問陳簡討繼皆其弟子也

附錄愚山云都昌罷官家居郡守姚善延以訓子以鄰人事連坐逮詣京師卒建文三年七月也劉鳳謂

勸姚守起兵爲衛尉執送死之誤矣

王澤字叔潤天台人僑居山陰洪武中官華亭縣丞有青霞集

叔潤詩音聲嘹亮亦是作家

附錄愚山云全室泐公有送王叔潤詩云平涼來又去官滿復之官則叔潤任平涼之華亭非松江華亭也

戴奎字文祥台州人洪武中齊河縣主簿有介軒

集

風定小軒無落葉青蟲相對吐秋絲秦淮海句也文祥
秋夜有懷云欲憑詩句寄秋風吟到宵分蜜炬終月色
如銀庭樹冷一絲和露墮青蟲移入夜景可謂青出於
藍

葉子奇字世傑龍泉人用薦主巴陵簿

世傑坐事繫獄於獄中撰草木子又有餘錄紀元季明
初事頗詳可資國史采擇詩特餘技爾

金慎字子肅嘉興人洪武初貢士官典史

柿林今之新城鎮也去嘉興府治西北三十里而近城

本作滕宋曾魯公嘗監秀州新滕酒稅金尉柿林新居
一詩格調雖卑然微官能詩足以見當時文教之盛

任原字本初休寧人明初以捍禦功授顯武將軍

雄鋒翼管萬戶有集

本初雖歷戎行實爲環谷東山談經弟子其詩互刊唐
仲實白雲集中今從燉煌程氏新安文獻志定爲任作